

PM Akan Putuskan Tindakan Berhubung Dakwaan "Cukup Jahat" WSJ

MStar

5 Julai 2015

Oleh: IWAN SHU-ASWAD SHUAIB

SEMENYIH: Datuk Seri Najib Tun Razak akan memutuskan tindakan undang-undang yang akan diambil terhadap media antarabangsa, The Wall Street Journal (WSJ) berhubung laporan yang mengaitkan beliau dengan dakwaan penyelewengan wang berjumlah AS\$700 juta atau RM2.6 bilion dalam beberapa hari lagi.

Menyifatkan tuduhan itu sebagai "cukup jahat", Perdana Menteri berkata, beliau telah merujuk perkara tersebut kepada peguamnya dan perbincangan sedang dijalankan bagi memutuskan tindakan selanjutnya.

"Peguam-peguam saya akan beri nasihat apakah tindakan susulan dalam bentuk undang-undang yang boleh saya buat di dalam dan luar negara.

"InsyaAllah saya akan buat keputusan dalam masa beberapa hari lagi mengenai tindakan selanjutnya yang diambil berhubung dakwaan yang cukup jahat ini," katanya pada sidang media di Majlis Iftar Rakyat Negeri Selangor bersama Perdana Menteri di Masjid Bandar Rinching di sini, Ahad.

Sidang media itu berlangsung kurang dua minit bertujuan untuk Perdana Menteri menyatakan pendiriannya berhubung perkara itu tanpa sesi soal jawab.

Pada Jumaat lalu, media antarabangsa itu menyiarkan satu artikel yang memetik 'penyiasat yang tidak dinamakan' mendakwa dana hampir AS\$700 juta (RM2.63 bilion) milik 1Malaysia Development Berhad (1MDB) telah disalurkan ke dalam akaun peribadi Perdana Menteri.

Bagaimanapun, 1MDB menegaskan tiada dana dipindahkan ke dalam akaun peribadi Najib.

Najib pada masa sama turut menafikan pemindahan sebarang dana yang dikaitkan dengan beliau, malahan beliau mendakwa bekas Perdana Menteri Tun Dr Mahathir Mohamad bertanggungjawab terhadap 'penipuan' terbaharu itu.

Hakcipta Terpelihara © 2015 Star Publications (M) Bhd (Co No 10894-D)

Source: <http://www.mstar.com.my/berita/berita-semasa/2015/07/05/pm-sahkan-ambil-tindakan-wsj/>